

Rakyat Tolak Pembangkang, Pilih Media Yang Bawa Berita Tepat - Nong Chik Bernama
4 Disember, 2012

KUALA LUMPUR, 4 Dis (Bernama) -- Rakyat semakin bijak dan pandai dalam memilih sumber berita yang tepat dan sahih, dan akan terus menolak pembohongan putar belit pembangkang, kata Menteri Wilayah Persekutuan dan Kesejahteraan Bandar Datuk Raja Nong Chik Zainal Abidin.

Beliau berkata rakyat tidak mudah terpedaya dengan berita yang di"spin" oleh parti pembangkang.

"Kepercayaan (rakyat) masih lagi diletakkan kepada kredibiliti media konvensional yang sentiasa menulis dan melaporkan perkara yang benar dan dari sumber yang sahih," katanya pada majlis penghargaan media kementerian itu di sini Selasa malam.

Raja Nong Chik berkata walaupun perkembangan teknologi semakin pantas dengan berita boleh diperolehi di hujung jari, namun beliau yakin rakyat dapat bezakan mana satu kebenaran dan mana satu pembohongan.

Beliau berkata kementerian itu akan memperkenalkan Anugerah Penghargaan Khas Media Wilayah Persekutuan pada tahun depan sebagai mengiktiraf jasa dan pengorbanan media cetak dan elektronik dalam membuat liputan mengenai Wilayah Persekutuan.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=713990>